

**Dua barisan kepimpinan PAS, jika perlu
MalaysiaKini.com
February 21,2012**

PAS sebagai parti alternatif perlu menguasai isu-isu dasar negara dan bukan "terjerat dalam kelompok pembangkang" yang hanya tahu membangkang tanpa penyelesaian berkesan.

Untuk itu, ketua Pemudaanya Nasrudin Hassan berkata, ia bermula dengan penyusunan semula saf kepimpinannya supaya terbentuk pemimpin parti dan sekali gus negara.

"Andai sukar untuk memiliki figure kepimpinan sedemikian, mungkin juga boleh mengambil kaedah dua line up kepimpinan, iaitu kepimpinan yang mengurus parti dan satu lagi kepimpinan yang mengurus negara.

"Namun kedua-dua line up (barisan) kepimpinan berada di dalam satu majlis permesyuaratan parti," katanya.

Dalam kenyataannya hari ini, Nasrudin berkata saranan itu dibuat bagi menangani cabaran sepuluh tahun akan datang parti Islam itu yang memerlukan kualiti kepimpinan dan organisasi.

"Usaha pengkaderan mesti kemas dan diberi perhatian utama oleh parti untuk melahirkan anggota dan kepimpinan parti yang komited dengan dasar perjuangan sekali gus mampu mendokong aspirasi parti," katanya.

"Parti mesti bijak serta pantas mengurus masalah, konflik dan tekanan agar tidak membuang terlalu banyak masa melayan kerenah masalah atau konflik yang timbul sedang perkara fundamental seperti melahirkan anggota dan kepimpinan parti yang berkualiti tinggi terabai."

Copyright © 1999-2012 Mkini Dotcom Sdn. Bhd
<http://www.malaysiakini.com/news/189770>